

DOMENIE III DI AVENT

Antifone di jentrade Fil 4,4-5

Stait simpri legris tal Signôr.
Us al torni a dî: stait legris,
il Signôr al è dongje.

No si **dis** Glorie a Diu.

Colete

Cjale, Diu, il to popul
ch' al spiete cun fede la nativitât dal Signôr
e fâs ch' al rivi a celebrâ cuntune contentece dute gnoval
il grant misteri de salvece.
Pal nestri Signôr Gjesù Crist to Fi, ch' al è Diu
e cun te al vîf e al regne dutune cul Spiritu Sant,
par ducj i secui dai secui.

PRIME LETURE Is 61,1-2.10-11

O gjoldarai une vore tal Signôr.
Dal libri dal profete Isaie
Il spirt dal Signôr Diu al è parsore di me,
parcè che il Signôr mi à onzût,
mi à mandât a puartâur la buine gnoval ai puars,
a fassâ chei dal cûr crevât,
e a contaûr ai depuartâts ch' a son libars,
ai presonîrs ch' a puedin lâ,
a proclaimâ un an di gracie de bande dal Signôr.
O gjoldarai une vore tal Signôr,
e la mê anime si indalegrarà tal gno Diu,
parcè che mi à rivestût cui vistîts de salvece,
e mi à taponât cu la manteline de justizie;
come un nuviç che si met une corone
e une nuvice che si furnis cu lis sôs zois.
Parcè che come la tiere e bute fûr i siei butui
e il zardin al fâs butulâ lis sôs semencis,
cussì il Signôr Diu al fasará butulâ la justizie
e la laut in face di ducj i forescj.
Peraule di Diu.

SALM RESPONSORIÂL Lc 1,46-50.53-54

R. La mê anime e gjolt intal gno Diu.

La mê anime e cjante la grandece dal Signôr
e il gno spirt al gjolt in Diu, gno salvadôr,
parcè che al à tignût cont de umiltât de sô sierve.
Ve, di cumò indenant
dutis lis gjenerazions mi disaran furtunade. **R.**

Parcè che Chel ch' al pò dut mi à fatis grandis robis,
e sant al è il so non,
e passe di gjenerazion in gjenerazion la sô misericordie
par chei che lu temin. **R.**

Al à jemplâts di robe i afamâts

e al à parât indaûr a mans scjassant i siôrs.
Al à socorût Israel, so servidôr,
visantsi de sô misericordie. **R.**

SECONDE LETURE 1 Ts 5,16-24

Spirit, anime e cuarp, ch'a sedin tignûts cont cence maglis par cuant che al tornarà il Signôr.

De prime letare di san Pauli apuestul ai Tessalonicêz

Fradis, stait simpri legris. Preait cence soste. Ringraziait di dut. Di fat e je cheste la volontât di Diu in Gjesù Crist sul vuestri cont. No stait a distudâ il Spirit. No stait a dispreseâ lis profeziis. Esaminait dut e tignît ce ch'al è bon. Stait lontans di ogni sorte di mâl.

Il Diu de pâs us rinfuartissi fint insomp e dut ce ch'al è vuestri, spirit, anime e cuarp, ch'a sedin tignûts cont cence maglis par cuant che al tornarà il Signôr nestri Gjesù Crist. Chel che us clame al è di peraule e al puartarà dut al colm.

Peraule di Diu.

CJANT AL VANZELI Is 61,1

R. Aleluia, aleluia.

Il spirit dal Signôr al è parsore di me,
mi à mandât a puartâur la buine gnove ai puars.

R. Aleluia.

VANZELI Zn 1,6-8.19-28

Framieç di vualtris al è chel che vualtris no cognossêz.

Dal vanzeli seont Zuan

Al fo un om mandât di Diu,
il so non al jere Zuan.

Lui al vignì come testemoni
par fâi di testemoni a la lûs,
par che ducj a crodessim midiant di lui.
Nol jere lui la lûs,

ma par fâi di testemoni a la lûs.

Cheste e je la testemoneance di Zuan cuant che i gjudeos i mandarin di Gjerusalem predis e levits a domandâi: «Tu, cui sêstu?». Al professà, nol dineà, al professà: «Jo no soi il Crist». I domandarin: «Ce sêstu allore? Sêstu Elie?». Al dîs: «No lu soi». «Sêstu il profete?». Al rispuindè: «No». Alore i diserin: «Cui sêstu? In mût ch'o podin dâur une rispuente a di chei che nus an mandâts. Ce disistu di te?». Al rispuindè: «Jo o soi vôs di un ch'al berle tal desert: Dreçait la strade dal Signôr, come ch'al à dit il profete Isaie». E a jerin stâts mandâts dai fariseos. I domandarin ancjemò: «Parcè allore batisti se no tu sês ni il Crist ni Elie ni il profete?». Ur rispuindè Zuan: «Jo o batii cu l'aghe; framieç di vualtris al è chel che vualtris no cognossêz, chel ch'al ven dopo di me e che jo no merti nancje di disgrüpâi la coree dal sandul».

Chesçj fats a capitarin a Betanie, di là dal Gjordan, là ch'al jere Zuan ch'al batiate.
Peraule dal Signôr.

Si dîs O crôt.

Su lis ufiertis

Signôr, che ti vegni presentade cence polse
la ufierte di chest sacrifici,
par ch'e colmi il sant misteri che tu âs istituît
e cu la sô fuarce e operi in nô la tô salvece.
Par Crist nestri Signôr.

Antifone a la comunion cf. Is 35,4

Disêt ai cûrs sconsortâts:
Coragjo! No stait a vê pôre,
ve, il nestri Diu al ven e nus salvarà.

Daspò de comunion

O implorin, Signôr, la tô misericordie
par che chescj jutoris dal cîl nus smondein de tristerie
e nus preparin a lis fiestis ch'a stan par rivâ.
Par Crist nestri Signôr.